

COMUNICATO n. 3301 del 08/11/2025

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 8 de november vegn fora la puntata #511 del program ladin per la television

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 511.

I argomenc che vegn portà dant te la puntata de chesta setemèna l é:

N projet de barat e colaborazion anter la Berstot Ensema de Ciampedel e la Scola Enaip de Tieser desche ocajon de crescimonìa per duc.

En mèrtesc ai 4 de november a Ciampedel, aló da la senta de la Tislerai Ensema de la coprativa Oltre, l é stat portà dant na scontrèda e na marena anter i utenc de chesta sociazion e i studenc del istitut ENAIP de Tieser. Na sort de fradaa olache i bec de chesta doi realtèdes che laora sul teritorie, i à abù l met de se troèr, e tel cojinèr adum, se baratèr esperienze e idees tel spirit de l’acolièza, de l’incluzion e de la drete valorisazion de ogneun.

La Union Generèla di Ladins dla Dolomites l’à n President nef: più avisa Roland Verra.

Acà n meis, te la radunanza de la Union Generèla dai 10 de otober, i raprejentanc de la Unions de valèda e de la comunanza ladina da Busan i é stac chiamé a litèr l president nef.

Aldò de la litazion, l é vegnù fora belimpont Roland Verra. Verra l é na personalità n muie cognosciuda te la Ladinia; l é scrittor e poet, l se à dat ju trop co la cossa ladina e anter l auter l à corì l’encèria da Intendent de la scoles dal 1992 al 2018. Co la redazion de Pedies sion jic a se fèr contèr.

Te la rubrica de aprofondiment “Zebicher, per veder più davejin”: Ve conton del Ciastel Stetteneck de Ortije: n ciastel nominà te la conties de Karl Felix Wolf e che se pissèa oramai desfantà tel jir de la storia. Alincontra acà 25 egn, de gra a la enrescides di studiosc Herwig Prinoth e Stefan Planker, l é sutà fora la ruines sun Col da Pincan. Anter storia e contia donca, ve conteron de chest ciastel e de so patron l cavalier Stetteneck che i raprejenta na piata de gran valuta per la storia de Ortije e de duta Gherdena.

I reports de chesta setemèna i é stac enjigné e porté dant da Riccardo Zanoner e Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenìa da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenìa da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina.

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(us)